

Visoki predstavnik donio odluku o prijenosu vlasništva nad Fabrikom akumulatora na Fondaciju Srebrenica-Potočari spomen obilježje i mezarje i osnovao komisiju za utvrđivanje naknade

Visoki predstavnik, Paddy Ashdown, je danas, nakon konsultacija sa organima vlasti u Republici Srpskoj, donio Odluku kojom se vlasništvo nad Fabrikom akumulatora "A.S." a.d. Srebrenica prenosi na Fondaciju Srebrenica-Potočari spomen obilježje i mezarje. Ovom Odlukom visokog predstavnika se također osniva komisija koja će utvrditi iznos naknade koji Republika Srpska treba platiti sadašnjim vlasnicima i korisnicima Fabrike akumulatora prije septembra ove godine.

Donoseći ovu Odluku, visoki predstavnik je rekao: "Lokacija na kojoj se nalazi Fabrika akumulatora ima posebno mjesto u sjećanju porodica žrtava iz Srebrenice, budući da su na tom mjestu mnogi od njih posljednji put vidjeli svoje bližnje žive". Odluka visokog predstavnika ima punu podršku Izvršnog odbora Fondacije Srebrenica-Potočari spomen obilježje i mezarje. Fondacija će, nakon konsultacija sa porodicama žrtava, donijeti odluku o budućoj namjeni lokacije na kojoj se nalazi Fabrika akumulatora.